

SAMÞYKKT

um breytingu á samþykkt um stjórn og fundarsköp Hveragerðisbæjar nr. 923/2023.

1. gr.

37. gr. samþykktarinnar breytist og orðast svo, ásamt fyrirsögn:

Valdsvið nefnda og framsal bæjarstjórnar á valdi til fullnaðarafgreiðslu mála.

Í því skyni að stuðla að hagræðingu, skilvirkni og hraðari málsmeðferð er bæjarstjórn heimilt að fela nefndum/ráðum og stjórnnum sem taldar eru upp í 48. gr. þessarar samþykktar, að afgreiða, án staðfestingar bæjarstjórnar, mál á verksviði þeirra ef þau varða ekki fjárhag sveitarfélagsins umfram það sem kveðið er á um í fjárhagsáætlun, nema lög eða eðli máls mæli sérstaklega gegn því og þau víkja ekki frá stefnu bæjarstjórnar í veigamiklum málum.

Þegar sveitarstjórn nýtir heimild skv. 1. mgr. til framsals á valdi til töku fullnaðarákvörðunar skal slíkt koma fram í samþykktum þessum eða í viðauka með samþykkt þessari. Þá skal framsal valds einnig tilgreint í erindisbréfum nefnda, ráða, stjórna og samþykktum byggðasamlaga, sbr. 63. gr. samþykktar þessarar.

Þriðjungur fulltrúa í nefnd, ráði eða stjórn sem hefur fengið framselt vald til fullnaðarafgreiðslu máls, sbr. 1. mgr., getur farið fram á að bæjarstjórn taki ákvörðun í máli nema kveðið sé sérstaklega á um annað.

Fullnaðarákvarðanir sem teknar hafa verið á grundvelli heimildar í 1. mgr. sæta ekki eiginlegu málskoti innan stjórnsýslu sveitarfélagsins, heldur getur aðili máls átt rétt á endurupptöku ákvörðunar skv. 24. gr. stjórnsýslulaga nr. 37/1993. Ef óskað er endurupptöku máls skal leggja það fyrir bæjarráð til endanlegrar afgreiðslu nema sérstaklega sé kveðið á um annað. Um endurupptöku fer skv. 24. gr. stjórnsýslulaga nr. 37/1993.

2. gr.

D-liður 48. gr. samþykktarinnar breytist og orðast svo:

Stjórnir og samstarfsráð. Bæjarstjórn kýs í eftirfarandi stjórnir og samstarfsráð sem kosin eru á fyrsta eða öðrum fundi nýkjörinnar bæjarstjórnar og er kjörtímabil þeirra samkvæmt samþykktum um stjórn viðkomandi stofnunar:

1. *Héraðsnefnd Árnesinga bs.* Bæjarstjórn skipar í stjórn byggðasamlagsins samkvæmt samþykktum þess. Byggðasamlagið fer með þau verkefni sem kveðið er á um í samþykktum byggðasamlagsins.
2. *Brunavarnir Árnessýslu bs.* Bæjarstjórn skipar í stjórn byggðasamlagsins samkvæmt samþykktum þess. Byggðasamlagið fer með þau verkefni sem sveitarfélaginu eru falin skv. lögum um brunavarnir nr. 75/2000, og reglugerðum sem settar eru á grundvelli laganna og sem kveðið er á um í samþykktum byggðasamlagsins, sbr. auglýsingu nr. 122/2025.
3. *Tónlistarskóli Árnesinga bs.* Bæjarstjórn skipar í stjórn byggðasamlagsins samkvæmt samþykktum þess. Byggðasamlagið fer með rekstur tónlistarskóla í Árnessýslu og starfar eftir gildandi lögum um starfsemi tónlistarskóla og samþykktum byggðasamlagsins, sbr. auglýsingu nr. 121/2025.
4. *Héraðsskjalasafn Árnesinga bs.* Bæjarstjórn skipar í stjórn byggðasamlagsins samkvæmt samþykktum þess. Byggðasamlagið er opinbert skjalasafn og um starfsemi þess gilda ákvæði laga um opinber skjalasöfn nr. 77/2017 og reglugerða sem settar eru á grundvelli laganna. Byggðasamlagið sinnir söfnun, innheimtu og varðveislu skjala og annarra gagna í samræmi við ákvæði laga og samþykktir byggðasamlagsins.

5. *Byggðasafn Árnesinga bs.* Bæjarstjórn skipar í stjórn byggðasamlagsins samkvæmt samþykktum þess. Byggðasamlagið starfrækir byggðasafn og fer með önnur verkefni samkvæmt samþykktum byggðasamlagsins.
6. *Listasafn Árnesinga bs.* Bæjarstjórn skipar í stjórn byggðasamlagsins samkvæmt samþykktum þess. Byggðasamlagið starfrækir listasafn og fer með önnur verkefni samkvæmt samþykktum byggðasamlagsins.
7. *Bergrisinn bs.* Bæjarstjórn skipar í stjórn samkvæmt samþykktum byggðasamlagsins. Byggðasamlagið fer með þau verkefni sem sveitarfélaginu eru falin samkvæmt lögum um þjónustu við fatlað fólk með langvarandi stuðningsþarfir og reglugerðum sem settar eru á grundvelli laganna, sbr. auglýsingu nr. 560/2023.
8. *Heilbrigðiseftirlit Suðurlands bs.* Bæjarstjórn skipar í stjórn samkvæmt samþykktum byggðasamlagsins. Byggðasamlagið fer með þau verkefni sem kveðið er á um í lögum um hollustuhætti og mengunarvarnir nr. 7/1998 og samþykktum byggðasamlagsins.
9. *Sorpstöð Suðurlands bs.* Bæjarstjórn skipar í stjórn samkvæmt samþykktum byggðasamlagsins. Byggðasamlagið fer með þau verkefni sem kveðið er á um í samþykktum byggðasamlagsins á sviði úrgangsmála.
10. *Umdæmisráð barnaverndar.* Hveragerðisbær stendur sameiginlega að umdæmisráði barnaverndar ásamt öðrum sveitarfélögum á landsbyggðinni, í samræmi við 14. gr. barnaverndarlaga nr. 80/2002, með síðari breytingum, en bæjarstjórn skipar í ráðið skv. samningi um umdæmisráð barnaverndar.
11. *Barnaverndarþjónusta Hveragerðisbæjar og Sveitarfélagsins Ölfuss.* Samkvæmt samningi um rekstur barnaverndarþjónustu milli Hveragerðisbæjar og Sveitarfélagsins Ölfuss, sbr. auglýsingu nr. 885/2024, fer Hveragerðisbær með verkefni barnaverndarþjónustu samkvæmt 10. gr. barnaverndarlaga nr. 80/2002, sem ekki eru falin öðrum.

3. gr.

Við samþykktina bætast tveir nýir viðaukar sem verða viðauki III, um fullnaðarafgreiðslu mála hjá Bergrisanum bs., og viðauki IV, um fullnaðarafgreiðslu mála hjá Brunavörnum Árnassýslu bs, sem birtir eru með samþykkt þessari.

4. gr.

Samþykkt þessi sem bæjarstjórn Hveragerðisbæjar hefur sett samkvæmt ákvæðum 9. gr. og 18. gr. sveitarstjórnarlaga nr. 138/2011, staðfestist hér með til að öðlast þegar gildi.

Innviðaráðuneytinu, 19. nóvember 2025.

F. h. r.

Aðalsteinn Þorsteinsson.

Ólöf Sunna Jónsdóttir.

Viðauki III.

Um fullnaðarafgreiðslu mála hjá Bergrisanum bs.

1. gr.

Bergrisinn bs. er byggðasamlag nokkurra sveitarfélaga á Suðurlandi og er stofnað samkvæmt 94. gr. sveitarstjórnarlaga nr. 138/2011. Aðildarsveitarfélögin fela byggðasamlaginu skipulag og framkvæmd þjónustu við fatlað fólk á starfssvæðum aðildarsveitarfélaganna, í samræmi við lög nr. 38/2018 um þjónustu við fatlað fólk með langvarandi stuðningsþarfir og samþykktir byggðasamlagsins, sbr. auglýsingu nr. 560/2023.

Stjórn Bergrisans bs. hefur heimild, án staðfestingar bæjarráðs eða bæjarstjórnar Hveragerðisbæjar, til þess að taka fullnaðarákvarðanir í öllum málum er varða skipulag og framkvæmd þjónustu við fatlað fólk í sveitarfélaginu.

Stjórn Bergrisans bs. getur vísað afgreiðslu mála samkvæmt 1. mgr. til bæjarstjórnar og er skylt að vísa þeim til bæjarstjórnar sé þess óskað af minnst þriðjungi fulltrúa í stjórninni.

2. gr.

Fundargerðir stjórnarfundar Bergrisans bs. skulu sendar Hveragerðisbæ þegar stjórnarfundum er lokið og skal hver fundargerð lögð fram til kynningar á næsta reglulega fundi bæjarstjórnar.

3. gr.

Óski aðili frekari rökstuðnings við afgreiðslu stjórnar Bergrisans bs. eða kemur á framfæri kvörtun skal honum leiðbeint um réttarstöðu sína, meðal annars um heimild til að óska eftir endurupptöku máls hjá stjórn byggðasamlagsins með hliðsjón af 24. gr. stjórnsýslulaga. Telji stjórn byggðasamlagsins að skilyrði um endurupptöku séu fyrir hendi skal stjórn byggðasamlagsins taka málið upp að nýju. Þá skal aðila leiðbeint um kæruleiðir og kærufresti eftir því sem við á.

Viðauki IV.

Um fullnaðarafgreiðslu mála hjá Brunavörnum Árnassýslu bs.

1. gr.

Brunavarnir Árnassýslu bs. er byggðasamlag nokkurra sveitarfélaga á Suðurlandi og er stofnað samkvæmt 94. gr. sveitarstjórnarlaga nr. 138/2011. Aðildarsveitarfélögin fela byggðasamlaginu þau verkefni sem sveitarfélögunum eru falin skv. lögum um brunavarnir nr. 75/2000 og önnur verkefni sem kveðið er á um í samþykktum byggðasamlagsins, sbr. auglýsingu nr. 122/2025, á starfssvæðum aðildarsveitarfélaganna.

Stjórn Brunavarna Árnassýslu bs. hefur heimild, án staðfestingar bæjarráðs eða bæjarstjórnar Hveragerðisbæjar, til þess að taka fullnaðarákvarðanir í öllum málum er varða skipulag og framkvæmd allra verkefna byggðasamlagsins.

Stjórn Brunavarna Árnassýslu bs. getur vísað afgreiðslu mála samkvæmt 1. mgr. til bæjarstjórnar og er skylt að vísa þeim til bæjarstjórnar sé þess óskað af minnst þriðjungi fulltrúa í stjórninni.

2. gr.

Fundargerðir stjórnarfunda Brunavarna Árnæssýslu bs. skulu sendar Hveragerðisbæ þegar stjórnarfundum er lokið og skal hver fundargerð lögð fram til kynningar á næsta reglulega fundi bæjarstjórnar.

3. gr.

Óski aðili frekari rökstuðnings við afgreiðslu stjórnar Brunavarna Árnæssýslu bs. eða kemur á framfæri kvörtun skal honum leiðbeint um réttarstöðu sína, meðal annars um heimild til að óska eftir endurupptöku máls hjá stjórn byggðasamlagsins með hliðsjón af 24. gr. stjórnsýslulaga. Telji stjórn byggðasamlagsins að skilyrði um endurupptöku séu fyrir hendi skal stjórn byggðasamlagsins taka málið upp að nýju. Þá skal aðila leiðbeint um kæruleiðir og kærufresti eftir því sem við á.

B deild - Útgáfudagur: 3. desember 2025